



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

**Heitinga-i Liverpool toktsür
Ajax head coach kümogo**

**Yimjung atema sensaksemtsü
atema Ukraine-i nongnanger**

VOL. XXII ISSUE NO. 227 (ADOK 227)

DIMAPUR

AMUNGNÜ (SUNDAY)

AAMI (JUNE) 01, 2025

₹ 5.00

AKM-i IMDH nung mapa inyakba anentsü tuyur

Dimapur, May 31, 2025 (TYO): Ao Kaketshir Mungdang (AKM)-i Honibarnü Dr. Imkongliba Memorial District Hospital (IMDH) nung mapa inyakba anentsü tetuyuba agütsüogo.

Evaluation team kati IMDH Mokokchung nung mapa inyakba ano mereprangdang mapa maneni inyakba atema AKM-i KC Infra Projects Pvt. Ltd. Guwahati, Assam dang mapa anena atatsü tetuyuba agütsü.

IMDH Mokokchung nung mapa tasen aser yanglushiba ajak ya official clearance melii inyaker ta AKM Tatong Tir Onenpong aser Tongti Tezülur Satemmongba nati KC Infra Projects dangi shidi ka zülüogo.

Mapa inyaka alibatam jungjunga mereprang tashi aser

bangdakpuri formal clearance magütsü tashi May 31, 2025 nungi mapa kecha meinyaktsüla ta AKM-isa tetuyuba agütsüogo.

Iba tetuyuba ya tashishitsü malitsü, tebilemtsü abentsü aser standards & guidelines ama mapa ajak inyaksü atema agütsür ta parnokisa metetdaksüogo.

Iba tetuyuba anema inyakra AKM-i nüngdakba mapa inyaka aotsü anungji company-i tebilemtsü khuret abentsü aser tetuyuba sülen anidaksü ayongzüker ta parnokisa ashi.

Iba shidi ya Mokokchung Deputy Commissioner, Chief Medical Officer Mokokchung, Medical Superintendent, IMDH Mokokchung, Ao Senden aser Watsü Mungdang dangia yokogo.

N.T Bhutia-i Chümoukedima district semdang

Dimapur, May 31, 2025 (TYO): ECI Principal Secretary N.T Bhutia-i May 31, 2025 nü Chümoukedima nung BLOs aser Chümoukedima DC & DEO den senden ka amen.

Iba senden nung Chümoukedima aser Niuland district nungi ketdangsürtem elections agiba dak sendakba tebilemtsütem lemsatep.

N.T Bhutia-i Niuland district

nung election maparen tiptema inyaksü atema DEO balaka amenoktsü tebilemba lemsatep.

Paisa ketdangsürtem dang Commission dangi nüngdaktem abentsü metetdaksü.

Ghaspani-l aser Ghaspani-ll polling stations semdangdang pai ketdangsürtem dang temsüa aliba voters ajak dendaktsütsü atema voter list mapang shia update asütsü metetdaksü.

Mokokchung nung 'Tiranga Yatra' agi



Dimapur, May 31, 2025 (TYO): India nung sensotemi linük atema nüma atangba aser longjema aliba tamaitü sayuba den külemi Indian Armed Forces pusema nungitba sayua Mokokchung district nung May 31, 2025 nü 'Tiranga Yatra' agiogo.

Main Police Point, Mokokchung nung sentong ka agidang Information & Public Relations, Soil & Water Conservation Advisor Imkong. L. Imchen-i kiralongrartemi Pahalgam amakba aitsü.

"Pahalgam amakba aser

Pakistan-i yaria kiralongra mapa inyakba aitsür. India-i 'Operation Sindoor' ajanga telangzüba tajung agütsüogo aser iba ajanga India ya tashitait aser tashitemetet linük ka alima dang sayuogo" ta Advisor Imkong-i ashi.

Indian Armed Forces-i linük kümzüka ayuba atema paisa tenüngsang agütsü.

Imkongmeren Sports Complex Associate Pastor, MTBA Rev. Wati-i sarasademer Yatra tenzük aser Ex. Servicemen League, Mokokchung-i anir nübertemi Main Police Point tashi jaja.

Nagaland nung NCP MLA ajak NDPP nung denogo

Kohima, May 31, 2025 (TYO): Nagaland nung Nationalist Congress Party (NCP) MLA 7 prongi party toktsür Nationalist Democratic Progressive Party (NDPP) nung denogo.

Honibarnü NCP MLA 7-i NDPP nung denogo ta Nagaland Legislative Assembly Speaker Sharingain Longkumer-i ashi.

Parnok ya 6 Tening Assembly Constituency nungi Namri Nchang, 32 Atoizu A/C nungi Picto Shohe, 38 Wokha Town A/C nungi Y. Mhonbemo Humtsoe, 46 Mon Town A/C nungi Y. Mankhao Konyak, 50 Longleng A/C nungi A. Pongshi Phom, 56 Noklak A/C nungi P. Longon aser 33 Suruhoto A/C nungi S. Toiho Yephtho nunger lir.

2023 Nagaland elections nung parnok ajaki NCP candidate ama takok angus aka NCP national lenisüba nung mepetmesü adokba sülen Nagaland nungi NCP MLA 7 prongi July 2023 nung NCPAjit Pawar den adentsü lemteta liasü.

Parnoki adenba ajanga 14 buba Nagaland Legislative Assembly nung NDPP nübo 25 aliba nungi 32 kümogo. Iba ajanga Chief Minister Neiphiu Rio'er sorkar nem absolute majority agütsüogo.

NCP-i 2023 elections nung menden 7 nung takok angu aser NDPP sülenbo largest political party liasü.

NLA Speaker-i tetuyuba agütsüba ama NCP MLA temi parnok NDPP den adentsü lemtetba indang formal letters

agütsü.

Iba den külemi NDPP President Chingwang Konyak nungi confirmation letter ka angu.

NCP MLA 7 prongi NDPP nung adenba nung tetsükdaksü kecha mali kechiyong iba ya Tenth Schedule nung Paragraph 4(2) kübok melar. Iba ya Assembly nung NCP Legislature Party 100% külemi adenba lir ta Speaker Sharingain-i ashi.

Members of Nagaland Legislative Assembly (Disqualification on Ground of Defection) Rules, 2019 nung ajemdaker Speaker-i NDPP nung adenba mulunga agizük aser Assembly Secretariat dang party affiliation records yanglushitsü tetuyuba agütsüogo.

Külen, Minister aser government spokesperson K.G. Kenye-ia NCP MLA tem NCP nung pelashishia agizükba metetdaksüogo.

"Tanü nikongdang parnoki Speaker dangi merger application agütsü aser pai ibaji mulungsoa agizük. Iba ajanga 14 buba Nagaland Legislative Assembly nung NDPP züngsem 25 nungi 32 kümogo" ta Kenye-i ashi.

NDPP tashi ulushiba ajanga Chief Minister Dr. Neiphiu Rio lenisüba tashi aitsü aser sorkari nübor tajungba tenzükba nung yaritsü ta Minister Kenye-isa ashi.

Iba ajanga sorkar teloktep nung seat-sharing inyakyim nung kongshitsü asü masü ta osangbeneri asüngdangdang

"teloktep party tem den permanent formula kecha mali" ta Kenye-i langzü.

"Yamai asütsü ta telemtet ka mali. Election shia tensa balala ajurur aser iba nung ajemdaker seat-sharing dena tanga maparen meyipa asadangsü akok" ta paisa metetdaksü.

Osangbenertemisa Cabinet nübo melenshitsü asütsü ta asüngdangdang "ibaji Chief Minister dak dang keta lir. Onoki pa den yakta ajuruteptsü imlar aser pa dang ang indangindang asüngdangtsüla" ta Minister Kenye-isa langzü.

NCP ya national party ka lir aser parnok indang tebilembaji Nagaland nung nüngdakbatem den meputep asütsü akok ta paisa ashi.

"National party ka ama parnoki linük tebilemtsütem atema ang inyaker aser idangji state dak sendakba nung temulung magütsüteter. Külen, NDPP ya tereprangtsübo national lir saka regional party ka ama tera yanga lir aser local taginübaten atema bendanga agüja inyaker" ta Kenye-isa ashi.

NDPP Legislature Party leader Dr. Rio lenisüba aser sorkar inyaksangshi ajanga NCP MLA tem atsür aruogo ta paisa shisem.

14 buba Nagaland Legislative Assembly nung MLA tem: NDPP - 32, BJP - 12, NPP - 5, LJP (Ram Vilas), Naga People's Front (NPF) & RPI (Athawale) - 2 each, JD(U) - 1 aser Independent - 4.

Nagaland nung cancer teimba moko ajanga adoker

Kohima, May 31, 2025 (TYO): Nagaland nung nisung aika dak cancer puteter aser teimba ka moko achiba ajanga adokba lir ta health experts-i tebilemtsü lemsatepogo.

Coraggio School Kohima nung World No Tobacco Day amungdang iba osang metetdaksü.

Iba sentong ya Nagaland Institute of Science and Technology (NIST) kübok Population-Based Cancer Registry-i Association of Oncologists of Northeast India (AONEI) den yaritepa ayongzü.

"Public temang atema lendong tulutiba rongnung moko lir aser iba ya lanurtem atema lir" ta NIST nung Population-Based Cancer Registry Principal Investigator Dr. V. Khamo-i ashi.

"Moko ajanga cancer aser temulungjang tashidak mesüra stroke adokdaksür. Cancer registry team ajanga Nagaland nung cancer tashidak indang osang tejangja bendentsü

meranger. Onoki mozü ki aser tanga rejutem nungi data bendener aser Nagaland nung cancer tapu balala aser adokba kulitem bushir" ta lai ashi.

"Nagaland nung nisung aika dak cancer puteter aser iba ya teimbaka moko ajanga adokba lir. Cancer agi shirang anepaluba nung sen aika endokba dang masü saka Nagaland nung anepaludak peria mali. Iba jagi shiranger aika state adena aoer aser iba ajanga kibongtemi senotsü aser tanga khuret jenti ajurur" ta Dr. Khamo

"Kaketshirtemi moko nungi pilaa alitsüla. Mokoji jenjang dalang aser melamela angur saka iba nung lendong tulu keta lir aser nü taküm raksatsütsü" ta lai ayongzü.

Iba sentong nung Hospital-Based Cancer Registry nung Research Scientist aser dental surgeon Dr. Vetsolu Hiese Koza-i taküm omen "Unmasking the Appeal: Exposing Industry Tactics on Tobacco and Nicotine

Products" jemi.

"Moko ya Nicotiana tabacum mesüra Nicotiana rustica plant nung agiteter aser nicotine keta lir. Iba ya addictive psychoactive substance ka lir aser nisung kati moko amshi tenzükra yimya sübar meindokteter" ta Dr. Koza-i ashi.

India nung moko achiba ajanga küm nung nisung lakh 12 nungi 13 tashi asür. Anogoshia nisung 3,500 shi asür aser alima nung oral cancer teimtiba alibaji India lir, ta laisa metetdaksü.

Tobacco products ta asüba nung tapu pezü lir aser itemji smoking, smokeless, heated tobacco, aser nicotine-only products lir ta Dr. Koza-i ashi.

Tobacco products nung arsenic, acetone, ammonia, benzene, cadmium, carbon monoxide, hydrazine, formaldehyde, naphthalene, nickel, aser radioactive polonium dena alir aser item ajak ya temang atema kanga majung ta laisa metetdaksü.

Süngkomen Ward nung surveillance camera amenokogo



Sungkomen ward, Mokokchung nung surveillance camera amenokba sentong agidang tangokba noksa nung angur. Mokokchung, 31st May, 2025

Mokokchung, 31 May (TYO): Mokokchung town kübok aliba Süngkomen ward sangertem asoshi osang tajung aser otsütsüsa 31st May, 2025 nü par ward nung Surveillance Camera (CCTV) amenokogo. Iba mapa ya Süngkomen Ward Youth Organization-i achayanga inyakba lir.

Süngkomen Ward Chairman, Yangerjungbai iba CCTV camera lapoktsü aser Süngkomen Baptist Arogo Asst. Pastor, Matsüing Longkumer-i sarasadema meshitetsü.

Sentong nung Süngkomen ward chairman, Yangerjungbai mapang tatsüka agidang, iba ama tensa den apet CCTV amenoktetsüsa lanurtemi mapa tajung inyakba ya kiyonger asoshi dang masü saka

tanünga ward-tem asoshia tatishitsü sayur, ano iba ama mapa tajung tarutsü nunga maneni inyaktsü ayongzü. Paisa Süngkomen Arogo-i yimden aser lanur nüngdak mapa ajak nung shilem tulu agia yariba asoshi pelaba metetdaksü.

Iba camera ya tongtibangsa nüburtem kümsüka ayuba den lokti temenai mapa aser özüng anema inyakertem meitsü nükjidong yur ward yimden den angatettepa inyakba mapatong ka lir, ta Süngkomen Ward Youth Organization Advisor, Temsükaba-i metetdaksü.

Iba mapatong inyakdang Süngkomen yimden, Süngkomen arogo, Süngkomen ward sanger aser ano tanga ward-tem aser lokti shirnokisa

tenla balala ajanga shilem agiogo, tetenlar ajak pelaba paisa lemsatep. Iba camera amenokba ajanga ward aser Mokokchung town nüburtem kümküma aser wazüka ayutsü imlar, ta paisa shisem.

Camera ajak agi 16 aser itemji tesem balala nung amenokogo. Joko Süngkomen ward ya surveillance area kübok aiter. Süngkomen Ward Youth Organization tir, Imrongkumba Aier-ia mapang tatsüka agidang, CCTV amenoktsü asoshi temulung lema shimtsüba ama, luden Tayonger - Temsukaba aser Temedanger - Wapang nadi anir züngsemtem aser iba mapa nung shilem agia yariteper ajak dang pelaba metetdaksü.

Printing & Stationery Director den tepila sentong agi

Kohima, Monupii/May 31 (TYO): Directorate of Printing & Stationery, Nagaland, Kohima nung May 31 nü mapa toktsüba Director, Neituolie Phewhuo den tepila sentong agiogo, shiba küm 35 inyakba sülen arishi küm 56buba nung mapa nungi anenogo.

Department indang Media Cell sangdong ka ajanga ashiba agi, Phewhuo ya 16-05-1990 nung mapai ai aser jenjang balala nung Department tenzüka sülen 01-05-2021 nü director aküm aser küm pezü HoD charge bena liasü.

Tepila sentong nung

Neituolie Phewhuo-i pa jakdang inyakertem aser pa den külemi inyakertem dang kanga pelaba lemsatepa liasü.

Sentong nungsa Department tenüing nung Joint Director, Jongpongtohi-i tepila o jembia aser pai, Director Phewhuo-i bendanga agüja tenzüka atema tenüing agütsüba den pa tekolak ser inyakba mapang takoktem indang metetdaksü, kong Chumoukidima nung Branch Press ka lapokba densema lir.

Department puti otsü nung tang mezügbuba mapa nungi anenba director nem Pension

Papers terenem pa nem amokja liasü aser iba atema Phewhuo-i kanga pelaba lemsatepba den Pension cell officers-i mapa tajung inyakba atema tenüing agüja liasü.

Sentong ya L. Ongpa Phom Registrar lenisüba nung agi aser Subhash Arambam aser T. Akala, Asst Director of Branch Press Office, Mokokchung ase Chumukedima natia o tatsütsü jembia liasü. Directorate Office aser Mokokchung aser Chumukedima Branch Press Office nungi ketdangsür aser staff temi iba sentong nung shilem agia liasü.

Mokokchung nung World No Tobacco day mungogo



Dimapur, Monupii/May 31 (TYO): GMS Senkalemba, Mokokchung nung May 31 nü World No Tobacco day mungogo.

Iba sentong ya National Tobacco Control Programme (NTCP)-i ayongzüka "Unmasking the appeal: Exposing Industry Tactics on Tobacco and Nicotine Product" omen nung ajemdaker agia liasü.

Sentong nung o jembiba

mapang DTCC A consultant Nukshiwati omen dak ajemdaker powerpoint presentation tatsüka agütsü aser moko ajanga timtem agütsüba indang tangazükba koda agütsütsü iba indang lemsatepa liasü. Paisa, moko achiba ajanga timtem adokba indang tangazükba agütsüba den kaketshirtem dang iba nungi pila alitsü ajungshia liasü.

Sentong tatemi Dental Surgeon IMDH Mokokchung

Dr. Keneitheja-i kaketshirtem angati oral check-up agütsü aser Tooth Brush aser Paste densema oral hygiene kits tem angati agi lemja liasü.

Kasa omen dak ajemdaker painting tetoktepba ka ayongzüka agi, koba Longdichem-i akok aser tanabuba aser tasembuba jenjang nung Puniang aser Khioniu na liasü. Takok angurtem nem senpet aser kuli kaketsü tajung agüja liasü.

Nagaland post yimozülur aser staff temi asükhu lemsatep

Dimapur, Monupii/May 31 (TYO): Nagaland Post yimozülur aser staff temi sangdong ka ajanga Hokolbar anepdang K.V.Nurumi Dimapur nung anojungi asüba osang angazüka aoksaba aser temulung koremba lemsatepogo.

Pa ya Nagaland nung documentarian mezüingpur aser free-lance journalist ka liasü. Asür K.V.Nurumi ya ajemalu, temeim agi sünga aliba aser teyarini nisung ka liasü, shiba pa meteta alir ajaki kanga meima liasü.

Pa ya free lancer ka aser pai Nagaland Post aser tanga media den osang aser feature tem

lemsatepa aruogo. Pa asüba ya Nagaland nung media fraternity atema takoksa aser medemer aser külem tenzüker ka samaogo. Pa asüba ajanga tawa tulu ka toktsüogo, koba süngdaksütsü tasak asütsü aser küm aika agitsü.

Nagaland Post yimozülur aser staff temi asür kinungertem den asükhu lemsateper, aser tulusang Tsüingremi iba mangyimjashi koktetsü atema parnok nem anisüngzü. agüjang ta, aser asür tanüla teti tatem makadak anisüngzükdakjang ta sarasademsür, ta kasa sagdong ajanga metetdaksü.

Mon SDO Civil-i metetdaksür

Dimapur, Monupii/May 31 (TYO): Tanur arishi küm 18 tekübok alirtem atema Pradhan Mantri Rashtriya Bal Puraskar (PMRBP) National Award dak sendakba nung Mon district administration-i ken o dak sendaka aliba officer aser lokti tentet balala dang ken o asadanga tanür arishi küm 18

tekübok alir shirnok PMRBP award atema temsüa ali parnok bushiteta DC office, Mon nem July 28 nü tashi nungbo osang agütsütsü metetdaksüogo.

Award ya Bravery, Social Service, Environment, Sports, Art & Culture and Science & technology ta category trok nung agütsütsü.

Mkg.nung Longleng aser Zunheboto DPRO Office aser Pungro asoshi APRO Office Virtual süa lapok



Tanü Mokokchung Advisor, Information & Public Relations and Soil & Water Conservation, Wb.Imkong L.Imchen-i Longleng aser Zunheboto District Public Relations Officer, Office aser Pungro asoshi Assistant Public Relation Office Virtual süa lapoktsür külen IPR Director aser Department officials-tem külemi tanokba noksa.

Mokokchung, Monupii/May 31 (TYO): District Public Relations Officer, Office, Mokokchung Conference Hall nung tanü Hon'ble Advisor, Information & Public Relations and Soil & Water Conservation, Government of Nagaland Wb.Imkong L.Imchen-i tsüogo.

Nüburtemi tajangzü. agitettsüsa department nung inyakertemi osang belenshiba mapaji nentaka inyaktsülatat Advisor Wb.Imkong L.Imchen-i Mokokchung, Zunheboto, longleng nungi adenshia aliba Public Relations department nung inyakertem ayongzüka jembia.

Advisor Wb.Imkong L.Imchen-isa nübur tenzüker ka ama Zünheboto, Longleng aser Pungro jagi tsüingdong oagi department nung inyaker aser nüburtem ajurunüa liasü, anungji sasa-a bilemer. Sakasa Cabinet Minister ka mesüka takokba tashi nung Naga nungger taginüba repringteta aser talisa

department asoshi tongtipang n nüngtak repringteta takokba tashi inyaktsü meranger aser ano maneni anünga aliba district-tem nunga tim inyaktsü sentong lirta ,etetdakja ashi.

Sentong nungsa Information & Public Relations Director Dzüvinuo Theünuo ajanga department tenüing nung jembia iba den ano DPRO Zünheboto Wb.Sentsuthung aser DPRO Longleng Wb.Ayong Phom tenati ki as ba osang den tepelaba o ashi, Kr.Tiakokla ajanga ken tajung ka tena sentong lemladaksü aser ADC Mokokchung Wb.Chumlamo Humtsoe ajanga tarur pela-a agizükba o jembia aser Tsüingrem dang sentong nung temoatsü jazüka aser office-tem meshiteta Pastor MTBA Wb.Yanglo Pongen ajanga sarasadem aser Wt.Asangla Imsong Joint Director Information & Public Relations lenisüba nung sentong ketdangsüa ania liasü.

Colombia-i Pakistan pusema jembiba o meyipa agir



May 31, 2025 nü Bogota, Colombia nung Congress lenir Shashi Tharoor leniba nungi Parliamentary telok kati Colombian Council on International Relations (CORI) den senden amendang tangokba noksa nung angur.

New Delhi, May 31 (Agencies): Congress MP, Shashi Tharoor-i Operation Sindoor mapang Colombia-i Pakistan nung asürtem den mangyim jashi lemsatepba atema Colombia dang mepelaba olen ka metetdaksüba sülen Colombia-i Pakistan pusema jembiba oji meyipa agiogo, ta osang ka ajanga metetdaksü.

Operation Sindoor outreach kübok Congress lenir Shashi Tharoor leniba nung party balala nungi shimetba MP tem telok kati Colombia semdang.

Tharoor-i Colombia dang mepelaba olen metetdaksüba sülen Colombia-i iba oji meyipa agiba dang masü saka India pusema sangdong tasen ka asütsütsü ta metetdaksüogo.

Osangbenertem den jembidang Tharoor-i, "Parnoki tamalen asenok mepelatsüsa

jembiba o meyipa agiogo aser asenok pusema sangdong tasen ka agütsütsü," ta metetdaksü.

Taoba mapang Indian Ambassador to US aser BJP lenir, Taranjit Singh Sandhu-i, Colombia-i parnoki jembiba o meyipa agibaji onoki osang tejangja angatetdaksüba agi lir, ta ashi.

Honibarnü osangbenertem den jembidang Sandhu-i, "Tanep onoki acting Foreign Minister den senden menogo. Ozü team lenir (Tharoor) den züngsem ajaki parnok nem osang tejangja metetdaksü. Colombia ya tongtiband, kechiyong kobi meli parnok Security Council nung züngsem ka akümtsü," ta metetdaksü.

May 7 nü India sepaitemi Operation Sindoor agiba mapang nung Pakistan nung asürtem atema Colombia sorkari

Pakistan den mangyim jashi lemsatepa liasü, aser iba atemaji Tharoor-i Colombia dang mepelaba lemsatep.

Tharoor-i, "Amakertem aser pusemertem tsüngda tepila kecha mali," ta ashi.

Tharoor-isa Pakistan-i kiralongrartem pusemba aser kiralongrartem asüpila sentongtem nung Pakistan nunger sepai ketdangsertem adenba noksa sayua liasü.

Operation Sindoor outreach kübok Tharoor-i aniba Parliamentary telok nung züngsemtemji Sarfaraz Ahmed (JMM), Tejasvi Surya (BJP), Ganapati Harish Madhur Balayogi (TDP), Shashank Mani Tripathi (BJP), Bhubaneswar Kalita (BJP), Milind Deora (Shiv Sena) aser taoba mapang Indian Ambassador to US, Taranjit Sandhu nunger lir.

Operation Sindoor mapang India nunger tayimtsü ka khazüka yok

New Delhi, May 31 (Agencies): Honibarnü Chief of Defence Staff, Anil Chauhan-i Operation Sindoor mapang May 8 anogo nung Pakistan nunger sepaitemi India nunger raraba tayimtsü ka khazüka yokba nangzükogo.

Singapore nung Bloomberg TV den jembidang Chauhan-i Pakistan nunger sepaitemi India nunger raraba tayimtsü ka khazüka yokbaji shidak ta ashi, ajisüaka tayimtsüji Rafales asü MiGs mesüra Sukhois'ar memetetdaksü.

"Tayimtsü khazüka yokbaji tongtiband masü saka kechisüba agi tayimtsüji khazüka yok, ibaji metettsüji tongtiband," ta pai ashi.

Maneni pa dang, India nunger tayimtsü kabosa

khazüka yok asü?, ta asüngdangba langzüdang pai 'hau' ta ashi.

"Tajung kaji- metokmeperi kuliji onoki angatet, metongshi aser anogo ana lirbo maneni onoki raraba tayimtsü ajakji meta talang nungi amshi," ta pai metetdaksü.

Pakistan nungeribo India nunger tayimtsü khazüka yok ta jembir, anungji aji shidak asü? ta asüngdangba langzüdang Chauhan-i, "Atangji ibaji shidak masü," ta ashi.

Iba interview agiba sülen Congress lenir, Jairam Ramesh-i iba interview shilem ka lemsatepa Ato kilonser Narendra Modi-i aniba sorkar dang, Operation Sindoor audit agitsü atema sorkari review committee ka tentetstü asü? ta

asüngdang.

Ramesh-i X ajanga, "1999 küm July 29 nü Vajpayee-i aniba sorkari India nunger strategic affairs nung mongin K. Subrahmanyam mendenbuba ser Kargil Review Committee ka tenteta liasü. Tang par jabasoji asen External Affairs Minister lir. Kargil War tembangba sülen anogo asem dang lirbo iba committee tenteta liasü. Iba Committee jagi ita pongu lir külen report tejangja agütsü. 'From Surprise to Reckoning' ta ajaba report ji 2000 küm February 23 nü Parliament House anaprongla nung benoka liasü. Chief of Defence Staff-i Singapore nung iba osang metetdaksüba sülen Modi sorkaria yamaji kasa inyaksü asü?" ta asüngdang.



May 31, 2025 nü Ethiopia nung NCP (SP) lenir Supriya Sule, BJP lenirtem- Rajiv Pratap Rudy, Anurag Thakur aser V Muraleedharan, Congress lenirtem- Manish Tewari aser Anand Sharma na, TDP lenir Lavu Sri Krishna Devarayalu, AAP lenir Vikramjit Singh Sahney aser taoba mapang India ketdangsür, Syed Akbaruddin nungeri Ethiopia nung taoba mapang Ato kilonser, Hailemariam Desalegn den senden amendang tangokba noksa nung angur.

India nung Covid agi shiranger 2,700 jungogo aser 7 süogo

New Delhi, Monupii/May 31 (Agencies): India nung Covid-19 agi teshirangdakpur 2,700 jungogo aser shiranger teimtibaji Kerala, Maharashtra aser Delhi nung lir.

State balala nung coronavirus tashidak agi nisung tenet süogo, aser asürtemji teimbaka tanga tashidak agia shirangerterem lir.

Health Ministry-i, May 29 kija nung Kerala nung nisung 227 dak covid putet, Maharashtra nung 424, Delhi nung 294 aser Gujarat nung nisung 223 dak covid putet, ta metetdaksü. Tamil Nadu nunga nisung 148, Karnataka nunga 148 aser West Bengal nung 116 dak iba tashidak putet. Tang India nung iba tashidak agi teshirangdakpur 2,710 jungogo.

May 30 tashi nung Maharashtra nung covid agi shiranger ana süogo aser Gujarat, Karnataka, Tamil Nadu, Punjab aser Delhi shia

nung nisung kaka süogo.

Hokolbarnü osangbenertem den jembidang Union Minister for Health & Ayush, Prataprao Jadhav-i, tang iba tensa azüoktsü atema sorkari telemtetba balala agia inyakdar; central health department aser Ayush ministry naprongla yakyaka lir aser state ajak nung iba tensa mita reprangdar, ta metetdakja liasü.

"Onoki health aser Ayush secretaries aser minister tem den tongtepratepa inyksangshidar," ta Jadhav-isa metetdaksü.

"Tamalen coronavirus wara mapang amenokba oxygen plants aser ICU yipten ama infrastructure balala asadangogo aser iba wara atema renemshi tenzükogo. Asenok indang health systems junga lir aser Covid dak sendakba nung tayongzükba tensa balala koktetstü atema renema dang lir," ta pai metetdaksü.



May 31, 2025 nü Singapore nung 22buba Shangri La Dialogue senden alidang India Chief of Defence Staff (CDS), General Anil Chauhan-i US Indo-Pacific Command nung Commander, Admiral Samuel J Paparo ajurua jurila senden amendang tangokba noksa nung angur.

Rajasthan nung arrtsülen alirtemi yim toktsür aotsü memelunger

New Delhi, May 31 (Agencies): Rajasthan state nung Pakistan den arrtsülen aliba yimtsüngtem nung yimdaklirtemi yim toktsür aienshitsü memelunger, ajisüaka parnoki sepaitem den külemi longjemer raratsü ta ashir.

India aser Pakistan arrtsülen Jaisalmer border nung jila tatembangbubaji Myajlar lir. 1965 küm India-Pakistan rara nunga iba tesem ya kanga tongtiband tesem ka liasü. Yimdaklirtemi tang tashi India nunger sepaitemi tank amshia Pakistan den raraba bilemteter.

Myajlar nung nütsüng 2,900 shi dang lir aser iba yim ya India nunger Thar lisem lima arrtsülen lir.

Sashastra Seema Bal (SSB) sepai nungi anisüngzüker alir arrshi küm 65, Kasab Singh Sodha-i, "Arrtsülen aliba jilatem nung taküm alitsüji kanga tasak, saka nüburtemji mapa meranga inyakerterem lir. Mapa dang

ngura parnoki tesem mashie oa inyaker," ta ashi.

Kasab Singh Sodha-i, "Rara mapang sorkari, mezüng yimtsüngtem nung yimdaklirtem aienshidaksütsü ta ashir, ajisüaka yimdaklirtemi sorkar dang 'onoki nenok den külemi raratsü ta shiogo," ta metetdaksü.

1971 küm Pakistan den raraba mapang nung Sodha arrshi küm 1 dang liasü, ajisüaka par tsüraburtemi ashiba otsü pai mamatoker.

"1965 aser 1971 küm raraba mapang nung yangi yimdaklirtemi army den külemi longjemer rara. Ozü nüburtemi kanga yariogo. Yangi aliba yimdaklirtemi ut nung sepaitem nem chiyungtsü aser tzü bener oja liasü," ta paisa metetdaksü.

Pa amaji Rajasthan nung arrtsülen aliba yimdaklirtem aikati Pakistan den rara adok nunga yim toktsür mainshitsü saka sepaitem den longjemer raratsü melungteter.



TIR YIMYIM YIMOBILEM (EDITORIAL)

DIMAPUR SUNDAY, AMUNGNÜ (AAMI) 01, 2025

Tsüngrem yimli

Kotakji Tsüngrem yimli, anungji yangji Tsüngremi mulungba dang inyaker. Aji oda, Tsüngremi kechi ashir aser kechi inyaksü tenyadir kotak tenyartemi kecha nungnanga melii inyaker. Ibaji mesüka tanü asenok aliba lima nunga asenok kibong aser mapa inyakdak ajak nung Tsüngrem mulung südakjang ta Yisui ashir. Tsüngremji anüing aser ali madak kibur, Pai asenok yanglu ta asenoki amanger, saka asenoki Pai mulungba nung meliner. Aji oda, kiburi ashi mangaba kilirtemji asenok lir. Ibayongji, asenok mulungjang nung tepela malir kechiyong asenok taküm aser kibongji Tsüngrem yimli nung masü moiijing yimli nung alir. Iba amaji jashia malitsü asoshi Yisui asenok dang Mathi tapu 6 nung, " Nü yimli arung, Kotak nung kechi koma lir, yamaji alima nunga nü mulung sang," ta Tsüngrem dang mepishia sarasademdaksüner. Alemli Yisu Khrista alimai marudang Yihuda nungertemi Tsüngrem yimliji alima nung bendanger yimten yimsüsüba ajak makdoker, Yehovah Tsüngremi parnok nem yimten tashi agütsür, alima ajak ramoka Israel nungertemi yimsü asütsü ta bilema liasü. Ibayongji, kenü anogo Yisu nütsüngtemia Pa dang Israel nem kadang yimli meyipa agütsütsü ta asüngdangba Laishiba nung angur. Ajisüaka, Tsüngrem yimliji alima yimli amato masü, alima yimlibo rara asee meputep adokdaksür saka Tsüngremi yimli nungbo teti tepela aser tesünep lir. Ibayongji, anogo shia asenoki Tsüngrem dang kü mulungjanga, ozü kibongi, ozü telok dangi, ozü yimtaki mesüra onok alidaki "nü yimli arung," ta sarasademtsü Yisui sayu. Tetezü, kü taküm mesüra onok rongnung kotak nung ama nai mulungba dang inyakdakjang ta Tsüngrem dang mepishitsübaji tongtibanga ta asenok nem angatetdaksür. Tanüa asenok aikati Tsüngrem yimliji asenoki manguba tasür tanülatem alidak kotak limaji danga ta bilemer. Ajisüaka, Tsüngrem yimliji asenoki manguba kotak limaji dangbo masü saka tanü asenok alidak lima aser asenok kibongtem ya lir. Anungji, idaki Tsüngremi mulungba inyaka alitsü tim. Aji oda, kadang asenoki asen taküm, kibong aser lokti ya Tsüngrem yimlia ta angatetter, idangji asenoki Tsüngremi mulungbaji kechi ta angateta inyaksü merangtsü. Yimten nunga kadang yimsüsürtemi parnoka Tsüngrem yimli nung tenzüker ta angateta yimsü südir, pei mulungba agi masü saka Tsüngrem mulungba nung yimsü asütsü. Iba kasaji arogo nung tenzükertemia kadang arogoji Tsüngrem yimlia ta angateta tenzükdir, tali tejangraba aser tajungba tenzüktettsü. Iba kasaji nisung shiai pei inyakba mapaji Tsüngrem yimli nung inyaker ta kadang angateta tenzükdir, ochimashi inyaksüba shisatsüji anasaia marutsü. Aji oda, kadang asenoki Tsüngremi mulungba inyaknüa Pa dang asüngdangdir, Pai asenok dang lenmang sayutsü. Idangjibo asenok Tsüngrem den külemi Pa yimli nung Pai mulungba mapa inyaker tongti kaka akümtsü. Koba mapa südir süang, alima nung Tsüngremi mulungba mapa inyaka alitsübajisa jangratemtsü taketba asütsü. Aji oda, Tsüngremi mulungba inyaksübaji yimten nung asütsüa akok, lokti nung asütsüa akok, arogo nung asütsüa akok mesüra pei taküm aser kibong business nung asütsüa akok. Atangji, asen taküm nung Tsüngremi mulungba mapa angatettsü aser reprangtettsübaji tasak, ibayongji Yisui asenok dang sarasadema Tsüngrem dang asüngdangtsü ajungshir. Sarasadema ajanga Tsüngremi asenok nem Pai mulungba mapa inyaksü asoshi renemtsütsü. Aji oda, asen taküm nung Tsüngremi mulungba dang inyakdakjang ta anogo shia asenoki sarasademtsübaji kanga tongtibang lir. Asen aliba lima ya Tsüngrem yimli küma alitsübaji asen taküm aser kibong nungi tenzüksüla. Idangji dang, ano asen aliba lima nung Tsüngrem yimli ulushia kümyonga aotsüba mapa nung Tsüngremi asenok amshitsü. Asenoki aiben Tsüngremi mulungba ama masü saka aseni mulungba nung inyaksü asoshi yimten aser lokti nung shilem agir, kechiyong alima nung arogo dak alaka yimten aser lokti tentetjibo Tsüngrem yimli masü amai bilemer. Ajisüaka, asenoki yimten aser lokti nungbo 'nü yimli taru, onoki mulungba dang inyakdi,' ta ashitsü makok. Iba amaji bilema inyakerkem aika laogo aser ano laotsü, anungji asenokibo asen yimten aser lokti nung dena Tsüngrem yimli jaokdi.

OLEMSABANG

Temulungjang tashitak aser Cholesterol tesendaktep:

~ Dr. N. Meren Imchen, Lower Bayavu Hill Kohima

Cholesterol level koma tudaktsür?:

- 1) Temo aketba chiyungtsü(saturated fats)- oda, mamatsü aser mamatsü nungi yangluba chiyungtsü, entsü(egg yolk) temo aketba shi tajem (red meat), totsü(oils), ano organ meat ta ajaba; shiruru indang temesen,tekolok,temulungjang, tazüngjang,azü(blood) item achiba ajanga cholesterol level tudaktsür.
- 2) Temang touzük taret aser teyira(overweight and obese) kümdaktsüba ajanga tudaktsür,
- 3) Temang arakzüa mapa meinyakba(lack of physical exercise) ajanga tudaktsür,
- 4) Tetsürtem ita shilem aoba yimya anener kelen ajongbena cholesterol level tudaktsür,
- 5) Tashitak kar eg. Hypothyroidism, temesen tashitak,kidney tashitak etc ajanga tudaktsür,
- 6) Temang tashitak tanga kar atema Steroids mozü achi danga tudaktsür,
- 7) Tsürabur nungia azü ajanga arur (hereditary).

Cholesterol ajema ayuba ajanga temulungjang tashitak noktangtsü anebalu-yim:

- 1) Sungo-lemba aonsotsü (green leafy vegetables) aser sungjanglijang peria achitsüla,
- 2) Temo aketba chiyungtsütem(foods containing fatty acids) melena temo maketba shi tetsü(lean meat),entsü temesung(egg white),teküp sadokba an-shi (skinned-off chicken), double-skimmed milk aser ango(fish) achitsüla.
- 3) Metsü tali enoka yangluba terenem chiyungtsü (baked foods) machi tajungba aser aon nung metsü tali mamshitsüla,
- 4) Cream aser temo atenba totsü-sang aser baking soda atenba amtsüktem,butter,ghee, pickles etc amala machitsüla,
- 5) Blood pressure normal level nung azüoka ayutsüla(120/80mmHg)
- 6) Sali-moko(Tobacco and its products) mamshiba tajungba,
- 7) Temesepba yi(Alcohol) majem tajungba,ajemertem atema tali majemtsüla,
- 8) Temang touzük shitak ayutsüla,
- 9) Anogo nung temang arakzüa mapa inyakba(physical exercise) minute 30-bo asütsüla,
- 10) Küm 45 nungi tema purtem Lipoprotein profile(Lipid profile) ta ajaba azü tendangba tapu ka mapang shia reprangtsüla. Iba tendangba nung cholesterol level=<200mg/dl den tajemba; LDL=<100mg/dl den tajemba; aser HDL=>60mg/dl den teimba alitsüla.
- 11) Mapang shia mozü shiteter ajurua temang tendangtsü kanga tongtipang, aser mozü koma achitsü zülutsür yamaji ajak shitak achitsüla. Doctor mozü agiaka tanga temang anebalu-yim oda taküm liba-liru aser achi-ajem azüoka ali-yim(Lifestyle modification) ajak nentaka inyaksüla.

Cholesterol level ajema ayutsü aser temulungjang tashitak nungi kümzüka alitsü atema temang nung abetba tim chiyungtsü(Healthy foods) shiem-a achitsü aser temang arakzüa mapa inyaksübaji(physical exercise) tongtipangtiba aser mezüngbuba tetuyubaji lir. Asen lima nung adokba aser anguba (locally available vegetables and fruits that are rich in fibre)sungolemba, aonsotsü, alo,carrot, radish,manu,mapu,meso etc amala aser sungjanglijang peria achitsüla.

Shiruru nungi anguba protein chiyungtsü (protein foods of animal origin) mechiner atema protein tena aliba aonsotsütem(proteins foods of vegetable origin) eg. soya bean,mokozüka aliba beans(sprouted beans),motor(peas),beans talangla(long beans),French beans,dal, cauliflowers, broccoli, konger(mushroom), mendi,jibi tu,spinach,beet tu,asparagüs aser iba den asen alu nung züsentetba aser arem nung anguba aonsotsütem amshitsü kanga tajungba asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Pakistan nung Bill ka agizükba Khristantemi pelaa agizüker



May 30, 2025 nü Pakistan Tir, Asif Ali Zardari-i Islamabad Capital Territory Child Marriage Restraint Bill, 2025 nung sign süa agizükdang tangokba noksa nung angur.

May 31, 2025: May 30, 2025 nü Pakistan Tir, Asif Ali Zardari-i tetsürtem anojungi kibong kümdaktsüba nokdangtsü atema bill ka agizüka sign süogo; iba ozüng tasenba kübok Islamabad Capital Territory (ICT) nung tetsür-tebur ajak kiyimtsü atema arrshi küm 18 bosa asütsüla.

"Parliament nung agizükba Islamabad Capital Territory Child Marriage Restraint Bill, 2025 ji ni agizüker," ta zülua aliba sangdong nung Zardari-i sign süogo.

Iba bill agizükba sülen Pakistan nung Khristan temeden atema inyakertemi iba ozüng pelaa agizükba lemsatep.

Pakistan nung Khristan aser Hindu tsürtem Muslim nungeri puer aoba sülen kangshia yimsü melendaktsür kibong kümdaktsür. Iba ozüng tasenba

ajanga Khristan tetsür chanutem anojungi kibong akümba nokdangtsü ta bilemer.

Pakistan nung Council of Islamic Ideology (CII) densema Islamic teloktemibo 'arrshi küm 18 ser tekübokpurtem kibong akümbaji tashiyim amshia raksatsüba' ta asübaji Sharia ozüng alema lir, ta shia iba Bill anema nokdaka liasü.

Iba ozüng kübok aibelenertem küm 1 tashi tepuokdak ayutsü aser senchi 100,000 tashi achitsü. Arrshi küm 18 ser temapur tebur kari danga arrshi küm 18 tekübok tetsür ka den kibong kümra küm 3 tashi tepuokdak ayutsü.

May 19, 2025 nü Pakistan People's Party (PPP) nungi Sherry Rehman-i iba bill benok aser May 16 nü Parliament nung iba bill agizükba sülen May 30

nü Tiri sign süa ozüng kümogo.

Iba bill benokdang lai, "Iba bill ya ozüng ka dang masü saka tetsürtem nem shisaliok, anema aliba taküm aser azükarua alitsü taküm temeden agütsütsü atema asenoki lemtetba ataloktsüba lir," ta metetdakja liasü.

Laisa tanga provinces danga iba ama ozüng agizüka benoktsü ajungshi.

Tiri iba bill sign süa agizükba sülen Pakistan nung Khristan temeden atema inyakertemi, iba ya ajanga nütsüng ajema alir (Khristan/Hindu) tetsürtem kangshia anojungi kibong kümdaktsüba aser Islam yimsü dangi meyipdaktsüba nokdangtsü, ta ashi.

Christian attorney, Lazar Allah Rakha-i, "Iba ozüng ya Islamabad Capital Territory

nung dang benoktsü saka ibaji ajanga Punjab Province nunga iba ozüng benoktsü atema lenmang lapoktsütsü imlar, kechiyong Punjab province nung Khristan tetsürtem aika kangshia Islam yimsü dangi meyipdaktsüba sülen Muslim nunger den kibong kümdaktsür," ta ashi.

Yaküm July ita nunga Pakistan national assembly nung akhidang British nunger yimsüsüba mapang yangluba ozüng Christian Marriage Act yanglushia liasü.

July 9, 2024 nü Pakistan assembly nung 1872 küm benokba ozüng yanglushiba bill ji agizük.

British nunger yimsüsüba mapang nung Khristan teburtem arrshi küm 16 nungbo kibong akümtsü akok aser Khristan tetsürtem arrshi küm 13 nungbo kibong akümtsü temelaba agüja liasü. Ajisüaka yaküm Pakistan assembly nung iba ozüng yanglushiba sülenbo Khristan tetsür-tebur ajak arrshi küm 18 abensaba sülen ang kibong akümtsü akok.

Tesüiba küm aika Khristan temeden atema inyakertem aser Arogo lenirtemi Pakistan nung Khristantem kibong akümtsü arrshi küm telatet teimba kümjang, ta takhangba agüja aruba sülen yaküm iba ozüng agizüka liasü.

Iba mapang nungji Catholic Bishops' Conference of Pakistan kübok National Commission for Justice and Peace (NCJP)-ia sangdong ka ajanga iba ozüng yanglushibaji pelaa agizük. Commission-i, assembly nung iba ozüng yanglushia agizükba ajanga Pakistan nung, talisa yimtsüngtem nung Khristan tetsürtem anojungi kangshia kibong kümdaktsüba mesüra Islam yimsü dangi meyipdaktsüba tebilemtsü anentsü, ta metetdakja liasü.

Pakistan nung Khristan tetsürtem puer aoba sülen kangshia Islam yimsü dangi yimsü meyipdaktsür Muslim nunger den kibong kümdaktsür.

2023 küm kija nunga Pakistan nung Khristan aser Hindu tsür 101 shi puer ao aser parnok teimbaka Hindu tsürtem liasü, ta NCJP-i metetdaktsü.

Pakistan nung tetsür shilem 18.3 bo arrshi küm 18 makümdang kibong akümer aser iba nungjagi shilem 3.6 bo arrshi küm 15 majungdang kibong kümdaktsürtem lir.

Nütsüng million 241 aliba Pakistan linük nung nütsüng shilem 1.6 dang Khristantem lir.

Alima nung Khristantem alitsü atema linük tamajungtiba 50 rongnung Pakistan ya jenjang 8buba nung lir (Open Doors' 2025 World Watch List).

ANOGO ABEN TSÜNGREM DEN

MEKURUI AGÜTSÜBA TEMOATSÜ

Nenoki pei asoshi kotak nung rongsen rizügang; kechi nung tarütsü aser song agi machir aser auüri merakpoker aser mauyar. Mathi 6:20

Maparen ajak temulung nung shisadanger inyakba nung takok, tabensa aser temoatsütem akar. Temulung nung meshisadangi jembira mesüra inyakra aiben iba nung tamakok, maksü aser tesama tashi ajangzüker. Agütsüba tsütsüa temulungtetba ya kanga tongtipang. 2 korint 9:7 nung ashir, nisung shia kechi koda pei temulung nung mulungtet aji oda agüjang, saka nungnanga masü, kangshia masü, kechiyong Tsüngremi pelashishia agütsüba meimer.

Agütsüyim nung nisung shia balala alir, kari meyipa angutsü yimlar, kari meyipa mangutsüpur repranga agütsür, kari pei agitsü tama rizünga yur ang agütsür, kari tuluba aser tajungba shima agütsür, kari pei dang nungiba pi-ang taoba ama bilema mokurui pei akaba nungi lemsateper. Tangatetba balala bener liteper, saka ajak dang tamajungtibaji Tsüngrem dang tenlaba nung süshia, nisung den süshia tagütsütsü tim sota ayuba agi temoatsü aika noktanger ta angatetdi. Anungji temoatsütem jaoka agütsüba nung shilem agitsü merangdi.

2 Korint 8:12 ashir, kechiyong tamasa mulungsoa lira, iba nung makaba yari masü, saka akaba yari pa tenla Tsüngrem tsüngdang agizüker.

Vietnam nunger pastor ka küm 12 jail nung puokba sülen chiokogo

May 31, 2025: Vietnam nung aliba Degar Protestant Arogo nung pastor, Y Yich küm 12 tashi jail nung puokba sülen tawa chiokogo, ta International Christian Concern (ICC)-i metetdaktsü.

2013 küm May 13 nü Vietnam sorkar ketdangsertemi pastor Yich pua liasü.

Degar Protestantism ya yimsü dak sendakba movement ka lir aser iba ya sorkari memelar.

Degar Protestantism prokba, pai internet ajanga United States nung aliba Montagnard pastor tem aser Separatists den tongtepratepba aser tepuokdak alirtem ajuruba agi ketdangsertemi pa pua liasü.

US nung Rep. Glenn Grothman-i 2022 küm nungi tenzüka Tom Lantos Human Rights Commission indang Defending Freedoms Project ajanga pastor Yich chioktsü atema inyaksangshi tenzüka liasü.

Grothman indang office-i email ajanga May ita nung pastor Yich chiokba osangji International Christian Concern (ICC) nem metetdaktsü.

Grothman-i, "Vietnam nunger Y Yich chiokba ajanga



Pastor Y Yich

kü melung kanga anisüngzüker. Pa Khristan asübayong tepuokdak ayuba osang angashiba sülen 2022 küm nungi ni pa chioktsü atema sponsor asü. Pa amajok nung küm 12 tashi tepuokdak yuogo aser tan May ita nung pa chioker. Tamangba yimsü nung ajemdaker shinga reshikangshi masütsüla mesüra tepuokdak mayutsüla," ta metetdaktsü.

Vietnam nung Communist sorkari tamangba yimsü kanga azüoker. Sorkar dang nungibo Tsüngrem tuluba züngshirtem anema inyaker aser meimchir temeden atema ola adokertem anema inyaker.

Communist Party-i Khristan yimsü amangertem dak temelung malemer, ibayongji

Khristantem mesenmetui züngshir aser tim masüba nung tepuokdak puoker.

Grothman-i, "Y Yich otsü ya ajanga alima nung communist inyakyim aser alima tesem ajaklen meimchir temeden anema inyakba asenok nem nenshia metetdaktsür. America temaba nung ajungketba ya tamangba yimsü temeden kümzükbaga agi lir, kechiyong mezünpurtemi tamang jenjang ya linük maitsü kümdaktsü. Ibayongji United States-i maneni alima tesem balala nung tashi alia amshiba sorkartem aitsütsüla aser alima tesem ajaklen tamangba yimsü temeden kümzüksüla," ta metetdaktsü.

Pastor Yich tepuokdak aliba mapang nung pai timtem kanga ajangshigogo aser temang nung timtem aika liaka pa nem medical teyari magütsü.

Grothman-i, "Tangbo Yich tesünep nung alitsü ta ni amanger. Vietnam sorkari taoba mapang jail nung alirtem dak maneni tenük yokbaji ni meteta lir. Ni US aser alima linüktem dang Y Yich ama yimsü temeden atema nokdakertem yaritsü ayongzüker," ta metetdaktsü.

Yimjung atema sensaksemtsü atema Ukraine-i nongnanger



Ukraine Air Force-i Honibarnü ashiba agi, Russia-i manger mesangwa tsüngda drone aser missile amshia Ukraine 114 ben makogo. Ukraine kübok tesem balala amakba mapang nisung 10 tepset aser nisung 33 yiruja liasü.

Kyiv, Monupii/May 30 (Agencies): Hombarnü yimjung atema ano sensaksemtsü asoshi Russia aser US nati nongshiba Ukraine-i magizüki arudar aser ashiba agi, ceasefire atema Russia-i benokba onüktem tama angutsü nüngdaker. Kasa mapang nung U.S. senator kati Moscow dang US-i parnok nem ano tenokdangba tesashi agütsütsü ta amokmerenogo.

U.S. tir Donald Trump-i Moscow aser Kyiv na dang küm asembuba rara aliba rara ya anentsü atema longjemer inyaksü nongshia arudar aser Russia-i taruba hopta Istanbul nung Ukraine nunger ketdangsürtem den tanabenbuba tejak o tejak na chitepa sensaksemtsü ayongzükogo.

Kyiv-i ashiba agi, yimjung atema sensaksemtsü asoshi parnok renema lir, saka parnok Russia nungi tezüluba nung tenangzüktepba ka atema atadar.

"Senden ka tajangzük ka-a akatsü asoshi onük jangja alitsü nüngdaker aser sensaksem atema kanga junga renemer alitsüla," ta Ukraine tir Volodymyr Zelenskiy-i Turkey indang foreign minister den Kyiv nung sensak asema sülen X nung zülutsü.

"Ajisüaka taruba senden nunga tenangzüktepba ka meyanglutettsü atema Russia-i takokba tashi jenjang agidar," ta pai Russia-i senden nung sensaksemtsü atema onüktem melemsatepba tetshia ashi.

Linük ana nungi lernirtem May 16 nü Istanbul nung ajurutep, saka senden nung tepuokertem melenteptsüba dak alaker tanga tenangzüktepba kecha meyanglutet.

Zelenskiy-i ashiba agi, pa aser Turkey tir Tayyip Erdogan na Hokolbarnü phone ajanga jembiogo aser iba mapang Russia-i Hombarnü senden ayongba nung shilem

agitsü atema Ukraine taginübatem sensaksemogo.

"Yimjung benoktsü atema ceasefire ka benoktsüla. Nisüngtem tepsetba anentsüla," ta Zelenskiy-i Telegram nung zülutsü.

"Iba seden ya tazüngla ka masütsü ta künapronglai bilemba lemsatepogo," ta Zelenskiy-isa shisem.

Ajisüaka pai Hombarnü senden nung Ukraine adentsü ta tenangzükba magütsü, saka pa aser Erdogan nati Ukraine, Russia, Turkey aser United States nungi lenirtem adenshia senden ka amentsüba i n d a n g b o sensaksemdangogo,ta ashi.

Kasa mapang nung Erdogan-i, Russia aser Ukraine nati Istanbul-i delegations tashitait yoktsüla ta ashiba den lenirtem senden amenba ajanga yimjung atema teyari agütsütsü akok, ta shisem.

U.S. Congress nung Republican kar aser White House adviser temi Trump dang Moscow tali nongshitsü atema Russia nem tenokdangba tasen agütsütsü mepeshia metetdaksüogo.

Republican Senator Lindsey Graham-i Kyiv semdangba mapang ashiba agi, Republican-i aniba US Senate-i Russia nem tenokdangba agütsütsü atema benokba bill ya taruba hopta agizüktsü imlar.

Graham, shibai Zelenskiy den Kyiv nung ajurutepa liasü pai osangbenertem den sensaksema mapang, pai Kyiv-i maru tsüngda Trump den sensaksemogo aser US tir-i Moscow-i jenjang tapet agitsü imlar ta ashi.

Graham-isa, yimjung atema sensaksem atsülangtsü merangba atema Russia tir Vladimir Putin aitsüogo aser ashiba agi Istanbul nung sensaksem ya kecha tajangzük makatsü.

"Puti-i asaya aliba asaya ya melenshitsü mapang tongogo.

United States-i tenokdangba tesashi agütsüba sülen pa dak kanga mejungi kongshitsü," ta Graham-i ashi.

Trump-i Hokolbarnü osangbenertem dang ashiba agi, Putin aser Zelenskiy naprongla tekong temerang aser pai ceasefire atema jembishinütsüba mapang Russia-i Ukraine dak bomb maneni pokloktsüba agi pa tezüadanger. Ajisüaka Trump-i tenokdangba agütsütsüba indangbo kecha mashi.

Alima tanabuba rara sülen tang Russia o Ukraine na rara ya rara tulutiba lir, koba Russia-i 2022 küm February ita nungi Ukraine amaka tenzükba sülen tenzüka liasü.

Sensaksem ka-aka tajangzük kangabo makatsü ama bilemer, kechiyong linük ana taginüba khenyongi balala lir.

Ajisüaka Kyiv aser Moscow napronglai Trump dang pai yimjung atema benokba pusemba sayuner. Kyiv-i US nungi military teyari talila aginer aser kasa mapang nung Moscow-a US-i Russia nem rongsenketzung nung tenokdangba agütsür aliba agintsü timla atadar.

Kremlin otongdar Dmitry Peskov-i ashiba agi, Russia nunger lenirtem Istanbul-i oa Hombarnü Ukraine den sensaksem atema renemtsü.

Moscow-i ashiba agi, Istanbul-i aotsü aliba lenirtem ya Vladimir Medinsky lenisüba nung aotsü. Pa lenisüba nungsa May 16 nü sensaksema liasü.

Rara anentsü atema Putin-i benokba onüktem rongnung pai anüolen aliba linük lenirtem dang anütokleni NATO atsülanga aotsü nokdangtsü asoshi akhangba densema lir.

Turkish Foreign Minister Hakan Fidan-i Kyiv nung osang benertem dang ashiba agi, Istanbul nung sensaksem sülen taruba jenjangji Trump, Putin, aser Zelenskiy nunger senden ka ayongzüka ametsüba asütsü.

MOLUNGEN O

Lt. Wapangnungsang Pongen

May 26, 1993 - May 24, 2025



Onok asür **Wapangnungsang Pongen'**er kinungertemi onok mangyim jashi tia nung aliba mapang shirnokisa onok den asükhu lemsatepba den sarasadem aser tanga lenla balala nung nongita yariogo nenok ajak dang kanga pelaba lemsateper. Nenoki temulung süngzüktsü o ashiba, onok semdangba, naro agi tetushi agütsüba aser mulungsoa yariba ajanga onok nem tashi aser anisüngzük agütsüogo. Nenok teyari aser mapa tajung atema ajak dangi tsüngtong arua tepela melemsatetba atema sasasete bilemer, saka iba sangdong ajanga nenok den tepela lemsatepba agizükang ta mepeshir.

Onoki item kija aser lokti dang mejeta pelaba lemsatepner:

KOHIMA MONGSENYIMTI SENSO TELONGJEM
KOHIMA MONGSENYIMTI FELLOWSHIP
DIMAPUR MONGSENYIMTI SENSO TELONGJEM
DIMAPUR MONGSENYIMTI FELLOWSHIP
KOHIMA AO BAPTIST AROGO
MONGSENYIMTI STUDENT UNIT KOHIMA
OKING HOSPITAL, KOHIMA DOCTORS & STAFFS
FAITH HOSPITAL, DIMAPUR DOCTORS & STAFFS
KOHIMA PRESS CLUB
TONGPANGMANEN ZUNGA, KOHIMA
PONGEN KIDONG KOHIMA/ DIMAPUR
SHRI. TONGPANG OZUKUM, Advisor to Chief Minister (Water Resources)
REPALEMZUNG (WOODS PUBLISHER, LENJITER)
M.S.G
T.T.Y.O

Nenoki teyar agütsüba aser aria bilemtsüba ya ozü kibong asoshi kanga senti liasü.

Tsüngremi nenok ajak molamoshia moajang.

~ Temeim Obala, Ojala aser Adianutem

West Bank semdangtsü memelaba atema Arab minister temi Israel aitsü

Cairo, Monupii/May 31 (Agencies): Arab linük pongu nungi foreign minister tem shirnoki iba hopta tatemi West Bank semdangtsü sentong liasü parnoki Israel-i parnok sentong nokdangtsü telemtetba agiba atema Israel aitsüogo.

Minister temi Deobarnü Ramallah semdanga Palestine State tir Mahmud Abbas den ajuruteptsü sentong aliba Israel-i nokdangba atema minister temi aitsüogo, ta Jordan foreign ministry-i Honibarnü ashi.

Egypt, Jordan, Qatar, Saudi Arabia aser United Arab Emirates minister temi Turkey den külemi iba senden nung shilem agitsü imla liasü.

Israel-i Hokolbarnü menor, parnoki Arab foreign minister tem senden amentsü memelatsü ta ashi. Parnok ya Jordan nungi West Bank-i aotsü atema Israel nungi temelaba agitsü nüngdaker, kechiyong Israel-i Palestine nunger litsü arrtsü aser anüng ajak azioka lir.

"Palestine nunger ketdangsürtem, shirnoki October 7 nü Israel nungertem tepsetba aitsütsü memulunger parnoki Ramallah nung Arab linüktem nungi foreign minister tem senden ka ayongzüka amentsü sentong lir, kong Palestinian state ka amenoktsü asoshi sensaksemtsü lir," ta Israel nunger ketdangsürtemi ashi.

"Israel indang security aser Israel yirutsütsü atema jenjang agiba Israel-i magizüktsü," ta parnokisa ashi.

France aser Saudi Arabia nati anir New York nung June 17 nungi 20 tashi Palestinian statehood ken o dak sendakba nung international conference ka ayongzüka agitsü lia Israel-i iba jenjang agiogo.

Israel ya United Nations aser Europe nung aliba linüktemi nongshia arudar, shirnoki Palestine

aser Israel mangatettep nung two-state solution ka pusema arudar. Iba kübok Israel den külemi nüjiso ngur aliba Palestinian state ka alitsü.

France tir Emmanuel Macron-i Hokolbarnü ashiba agi, Palestinian state ka agizüktsüji moral duty ka dang masü saka yimden yimsüsüba tsütsü tenüngdakba ka lir.

Taoba hopta Israel nunger sepaitemi West Bank nung Jenin refugee camp anasa diplomatic convoy ka dang injang khaloktsüba sülen alima kintemi parnok aitsü tenzük. Iba convoy nung European Union, United Kingdom, Russia aser China nungi diplomat tem densema liasü.

Israeli military-i ashiba agi, iba telok yagi jembiba lenmang nungi pila aoba sülen sepaitemi kümdangshitsü atema injang khatoka liasü.

Israel-isa, ozüing alema Palestine nunger litsü nung nüburtem liyonga aotsü asoshi temelaba agütsüogo aser sorkari settlement tasen 22 amenoktsü sentong aliba sangdongogo.

Iba jenjang agiba ya Palestine nunger ketdangsürtem aser global human rights teloktemi aitsüogo.

International Court of Justice-i taoba küm July ita Israel-i, Palestine nunger litsü atsüngba ya ozüing alema lir ta shiogo aser West Bank aser East Jerusalem nung parnoki atsünger aliba tesem azüngtettsütsü tetuyuba agütsüogo.

Gaza nung rara tenzükba sülen West Bank nunga Palestine nunger 972 tepsetogo aser nisung 7,000 dak tema yiruogo, ta Palestinian Ministry of Health-i ashi.

October 7 nü Hamas puri Israel amakba sülen nisung 1,139 tepset aser nisung 200 pur oa liasü. Iba sülen Israel-i meyipar Gaza nung Palestine nunger 54,381 tepsetogo aser nisung 124,054 yirutsüogo.

French Open: Jannik Sinner round of 16-i iogo



Jannik Sinner

Monupii/May 31, 2025 (Agencies): Tang asaya aliba French Open tebur kija asaya nung world number one Jannik Sinner-i Honibrnū tasembuba round asaya amokbanger asaya-a Czech nung asayar Jiri Lehecka kokogo.

Court Suzanne-Lenglen nung tasembuba round asaya ya Sinner-i 6-0, 6-1, 6-2 agi ayong ayonga koka liasü. Tena tang agi tasembubaba asaya liasü aser Sinner-i ghonda ka ser minute 34 nung dang asaya akok.

Tetsür kija asaya nung America tsür Jessica Pegula aser Russia tsür Mirra Andreeva natia pei tata asaya kokogo.

Iba asaya akokba sülen Sinner taruba asaya Russia nung asayar Andrey Rublev

den asayatsü, shiba France nung asayar Arthur Fils yiruba ajanga masayatyetsüsa akümba sülen round pezübuba tongtetogo.

Sinner ya tenokdangba agütsür aliba mozü amshiba atema ita asem tenokdangba agütsür aliba tembangba sülen May ita nungi asaya tenzükogo, aser pai Italian Open nunga final tonga asaya saka Carlos Alcaraz mekoktet.

Sinner-i Roland Garros nunga kanga junga asayadar aser tang tashi nung set ka nunga danga tamakok ngua mali aser 2024 US Open aser Australian Open sülen tang tashi nung Grand Slam nung asaya 17buba atonga kokogo.

Tetsürtem asaya nung third-seeded America tsür Jessica Pegula-i kanga meranga

asayar Czech tsür Marketa Vondrousova 3-6, 6-4, 6-2 agi kokogo. Pegula shiba 2024 US Open runner-up liasü, la taruba round nung France tsür Lois Boisson mesüra Elsa Jacquemot den asayatsü.

Maneni Mirra Andreeva-i maneni kanga junga asaya-a lai Kazakhstan tsür Yulia Putintseva 6-3, 6-1 agi kokogo.

Arishi küm 18 tain asayar ya taruba round nung Daria Kasatkina den asayatsü, shibai Spain tsür Paula Badosa 6-1, 7-5 agi kokogo.

Kasatkina ya shitakbabo Russia tsür saka tangbo Australia tenüng nungi asayar. La tang agi Grand Slam tekububa nungang asayar saka lai asayamung pongu tashi nung tanabuba hopta tonga asayatetogo.

Heitinga-i Liverpool toktsür Ajax head coach kümogo



John Heitinga

Monupii/May 31, 2025 (Agencies): John Heitinga-i Dutch club Ajax indang head coach mapa agizüktsü atema Liverpool nung assistant coach mapa toktsüogo.

Taoba mapang Netherlands nung defender ya Ajax nungi 200 ben dak temaben asayaogo aser iba sülen pa club reserve team indang coach liasü aser interim head coach-a inyakogo.

Arishi küm 41 tain coach yagi club den küm ana atema

tenangzüktepba yangluogo aser pa nem Marcel Keizer-i teyari agütsütsü. Keizer-a Ajax academy nungi anitetba lir.

Heitinga-i Francesco Farioli melenogo, shibai season ka inyakba sülen taoba hopta mapa tokja liasü.

League tembangtsü asaya tenet anunga lia Farioli-i aniba team ya tanabuba jenjang nung aliba team dang nungi point teku agi timba liasü, saka parnok PSV Eindhoven sülen tanabuba jenjang nungang tembanga liasü.

Iba tetezü Ajax pur season asembuba takok marok ka danga monguteti tembangogo, shirnoki Dutch league ya otsüsütsüsa 36 ben koka lir.

"John ya coach tajung ka aser pa tejangraba tulu lir," ta technical director Alex Kroes-i ashi.

"Pa takok ngunüba nisung ka aser küm tsüngda pa Premier League aser Champions League nung asayaba mapang renlokogo.

"John-i club kanga junga meteta lir aser Marcel den külemi pai onok asayartem terenlok asoshi teyari agütsütsü," ta paisa ashi.

2022-23 season tatemlen Heitinga lenisüba nung Ajax puri asaya 22 nungi asaya 14 koka parnok tasembuba jenjang nung tembanga liasü.

Iba sülen Heitinga ya 2023-24 season nung David Moyes kübok West Ham indang first-team coach aküm aser iba sülen Liverpool nung Arne Slot indang assistant ama aden aser Liverpool puri Premier League akokba nung teyari agütsüogo.

"Ni mapa tenzüktsü yongyaseta atar," ta Heitinga-i ashi, shiba asaya aliba mapang Atletico Madrid, Everton, Fulham aser Hertha Berlin nungia asayaogo.

"Taoba küm England nung inyakba mapang ni aika angazükogo. Head coach ama inyaktü ni renema lir aser Ajax nung iba maongka agütsüba atema pelar," ta paisa ashi.

West Indies den tanungba asaya nung Overton masayatetsü

Monupii/May 31, 2025 (Agencies): England nung fast bowler Jamie Overton temeyong yiruba sülen tang West Indies den asaya aliba one-day internationals asayamung nung tanungba asaya ana nung masayatetsü.

Brehostibarnü asayamung nung mezüngbuba asaya Edgbaston nung asayaba mapang ball aputsü merandang Overton temeyong raksa liasü. Iba asaya ya England-i kanga junga koka liasü.

Iba tatalokba sülen arishi küm 31 tain bowler ya ground toktsür ao aser temeyong anepaluba sülen meyipa arur bowling aon aser pai wicket 3 agia liasü.

Pa melena team nung asayar tasen maniok aser Brehostibarnü West Indies akokba team nung asayar ka danga memelen saka England XI nung Matthew Potts-i Overton melenogo. Potts tang agi ODI nung 10benbuba

asayatsü lir aser taoba küm September ita tatemsa asayaba sülen tang mezüngbuba asayatsü maongka nguogo.

Temeyong yiruba sülen Overton ya ita ka shi masayatetsü imlar, anungji pa West Indies den ODI asayaba sülen asayatsü aliba T20s asayamung nunga masayatetsü. England aser West Indies na T20-a asem asayatsü lir.

ODI squad nung fast bowlers temji Potts aser Luke Wood na asütsü.

Mark Wood, Jofra Archer aser Gus Atkinson nung ajak yiruba ajanga masayatetsüsa akümba sülen tang ano Overton-a yiruogo.

Harry Brook lenisüba nung tang mezüngbuba England team white ball cricket asaya tenzükogo aser parnoki Birmingham nung mezüngbuba asayaba mapang asayar 8 out sür run 400 yanglu aser run 238 agi asaya ayong ayonga koka liasü.

AC Milan-i Allegri Head coach amashimshiogo



Massimiliano Allegri

Monupii/May 31, 2025 (Agencies): AC Milan-i head coach ama Massimiliano Allegri tanaben shimshiogo.

Arishi küm 57 tain Italy nung coach yagi iba Serie A club ya 2010 küm June 10 nungi 2014 küm January ita tashi achayanga liasü.

Allegri-i Sergio Conceicao melenogo, shiba ita trok dang inyakba sülen Brehostibarnü mapa nungi anenja liasü.

"Club-i Massimiliano aser pa indang staff pelashishia agizüker aser takok ngua aotsü imlaja atar," ta Milan-i sangdong ka ajanga metetdaksü.

AC Milan pur 2024-25 season kanga tezüdangtsüka jenjang tibuba nung tembang aser Coppa Italia nunga parnoki Bologna makok. Iba tetezü parnok taruba season Europe nung asayamung nung masayatsü.

AC Milan puri Serie A ya tatemsa 2021-22 season nung

Stefano Pioli lenisüba nung koka liasü. Parnoki Serie A ya 19 ben koker lir.

2010-11 season nung mezüngbuba Milan coach ama inyakba mapang Allegri-i Scudetto akok, saka iba sülen pa mapa nungi anenja liasü.

Iba sülen pa 2014 nungi 2019 tsüngda Juventus nungi kanga takok ngua inyak, kong pai season pongu atonga Serie A title bena liasü.

Juve nung inyakba mapang parnok Champions League nung final ana tashi nung tamakok ngua liasü. Iba sülen pai tangatettep nung club toktsü.

Küm ana tashi coach mapa minyaki lir Allegri 2021 nungi 2024 tashi Turin nung inyakhshi, saka taoba mapang ama takok mongutet.

Allegri-i taoba mapang Aglianese, SPAL, Grosseto, Sassuolo aser Cagliari nung nunga head coach mapa inyakogo.

BILEMDANGANG

"Tenüngsang agi sünga aliba mulung ka pela dang alir."